

**Khalid Ibrahim akur Faekah dikenakan tindakan disiplin PKR**  
**Malaysian Insider**  
**Julai 2, 2014**  
**Oleh Jamilah Kamarudin**

Calon Timbalan Presiden PKR Tan Sri Abdul Khalid Ibrahim akur dengan tindakan PKR mengenakan hukuman terhadap dua orang kanannya kerana melanggar disiplin semasa pemilihan parti.

Khalid bagaimanapun menasihati Setiausaha Politiknya, Mustapha Mohd Talib dan Ketua Pegawai Eksekutif (CEO) Menteri Besar Incorporated (MBI) yang juga Penyelaras Dewan Undangan Negeri (DUN) Pelabuhan Klang Faekah Hussein supaya mengemukakan rayuan.

"Tak apa. Kalau itu keputusan Biro Disiplin, kita mesti terima."

"Mereka berhak membuat permohonan untuk rayuan dan dalam parti kita ada proses rayuan," katanya pada sidang media di Shah Alam, hari ini. Lembaga Disiplin PKR memutuskan menggantung keahlian Mustapha selama setahun secara serta merta.

Pengerusinya, Datuk Dr Tan Kee Kwong berkata, ini ekoran tindakan mengugut yang dilakukan Mustapha terhadap seorang calon untuk tidak meneruskan niat bertanding jawatan ketua Cabang Kuala Selangor.

Manakala Faekah dikenakan surat tunjuk sebab kerana mengeluarkan kenyataan di media.

Turut dikenakan surat tunjuk sebab adalah calon Naib Presiden PKR, Shamsul Iskandar Mohd Akin dan calon Ketua Angkatan Muda Keadilan (AMK), Amiruddin Shaari.

Khalid berkata, pemimpin perlu menunjukkan kematangan dalam parti dan bukan mengenakan serangan peribadi.

Katanya, PKR perlu menunjukkan contoh sebagai satu parti yang mampu bersaing dengan Barisan Nasional (BN) jika dipilih rakyat untuk memerintah negara.

"Itu biasanya bukan diberi komen dalam perbincangan media tetapi boleh jadi jika perlu dibawa ke Biro Politik untuk dibincangkan," katanya mengulas mengenai kritikan yang dibuat Shamsul.

Shamsul secara terbuka mendesak pengunduran segera Khalid daripada jawatan menteri besar ekoran gagal mempertahankan jawatan Ketua PKR Cabang Kuala Selangor yang disandang sebelum ini.

Khalid berkata, beliau yakin sebahagian besar Adun dan Exco Selangor masih menyokong kepimpinannya, malah menganggap spekulasi pengundurannya tidak akan menguntungkan mana-mana pihak.

"Bukan itu sahaja sebab tujuan PRt apabila diberikan mandat adalah untuk menentukan rakyat memberikan amanah kepada wakil DUN menjalankan tugas dengan amanah dan tanggungjawab," katanya. – 2 Julai, 2014.

Hakcipta © 2013 The Malaysian Insider

Source: <http://www.themalaysianinsider.com/bahasa/article/khalid-ibrahim-akur-faekah-dikenakan-tindakan-disiplin-pkr>